

244.

1396, März 24.

Der Knappe Henning Eggerde zu Bahrendorf verkauft an Tyle zum Dome, Bürger in Magdeburg, drei Viertel Winterkorn aus dem Zehnten zu Bahrendorf, Kloster-Bergisches Lehn.

Ik Hennyng Eggherdes knape wohnhaftich in dem dorpe to Barndorp unde myne erven bekenne unde bethuge opeliken in dyssem brieve vor allen luden de one sehen oder horen lesen dat ik myt fulbort unde myt guden willen Fritzen und Tylen myner brudere ok geheiten Eggherde recht und redeliken vorkoft hebbe deme vorsichtigen Tylen tam dume burgere to Meydeburg dre verndel winterkorns ut deme theyden to Barndorp die ik und die sulven myne brudere in langen tyden in roweliker were gehat hebben und hebben yn die ghegeven vor achte mark Meydeburgesche weringe de my vul und al betalet syn und hebben ome de dry verndel theyden upghelaten vor unserm herren dem apte van Berge bi Meydeburg die des selven gudes lenherre is dar mede to dunde und to latende wat he wil und willen den sulven Tylen to dem dume des gudes eyn rechte were syn wor und wannen des nod is. Vnd to bekentnis alle disser vorscrevene ding hebbe wy Hennyng Fritze unde Tyle brudere geheyten Eggherde vorgenante alle dre vnser ingesegelen witliken gehengit laten an dyssem brieve und ik Tyle tam dume burger to Meydeburg vorgenant bekenne in dyssem selven brieve, dat ik die selven dre verndel theyden winterkorns oppere und gheve deme convente ghemeyne des godeshuses und closteres to Berge in dysser wise dat se scholen alle iare enes des ersten mandaghes in der vastenen vilien unde selemesse in eren munstere dar vore holden mynen vadere Tylen tam dume, Rosen, Walen, Greten, Yden unde Metten, (Rosen, Walen husfruwen waren) eren selen to troste und to ghenaden. Vnd wy Arnd van der genadens gods abbat des vorgenanten closteres to Berge bekennen und bethugen in dyssem brieve dat alle disse vorghescrevene stucke unde artikele gheschen sint myt unser witschap und fulbort unde hebben des to bekentnisse unser ingesegel witliken und myt unsen guden willen gehenget laten an dyssem brieve. Gegeven nach Christi ghebort drittayn hundert iar in deme sesse und neghentighesten iare an unser leven vrouwen avende annunciaconis.

*Original im Staatsarchiv zu Magdeburg s. r. Kloster-Bergische Stiftung 70.
Abschrift im Privilegienbuche S. 48—50 mit der Ueberschrift: Barendorp vendita
III ferndel winter korns. in capsula H VI.*